



19. Tschanteda da la suprastanza cumünela in marculdi, ils 30.11.2016 a las 17.00 illa chesa federela a Berna

Presidi: Duri Campell

Preschaints: Gian Andrea Bott, Paolo Bernasconi, Jnes Barblan, Liun Quadri

Absaints:

Actuar: Duri Schwenninger

Tractandas:

- | | | |
|----|-------|---|
| 1. | | Protocol |
| 2. | 0.211 | Dumandas da fabrica |
| 3. | 3.000 | Convegna da prestaziun museum Engiadinais |
| 4. | 0.209 | Contrat traunter la vschinauncha da S-chanf e la Bos-chetta Plauna SA, decisiun da desdir il contrat |
| 5. | 7.900 | Consultaziun adattamaints plan directiv chantunel i'ls sectuors politica da la planisaziun dal territori (chapitel 2) e territori abitabel (chapitel 5) |
| 6. | 7.000 | Eliminaziun protecziun da zonas d'ova da fuonz per garantir la qualited da l'ova potabla, surdeda lavuors da geoloc |
| 7. | 1.500 | Implaunt da tir regiunel Bos-chetta Plauna |
| 8. | 9.999 | Varia |

La glista da tractandas vain approveda cun agiundscher la tractanda consultaziun plan sectoriel da militer e la deliberaziun da credit pel schlargiamaint da la canorta Randulina a Zuoz.

Protocol: Il protocol da la tschanteda dals 16.11.2016 vain approvo.

168 3.000 Cultura Convegna da prestaziun museum Engiadinais

La fundaziun museum Engiadinais exista daspö passa 100 ans. Daspö l'an 1916 sustegna il circol Engiadin'Ota la fundaziun regard il mantegniment e la gestiun. Siand cha'l circol vain scholt la fin da l'an 2017, vain adatto il documaint da fundaziun scu eir garantieu la gestiun economica dal museum in avegnir. Per las vschinaunchas da l'Engiadin'Ota sto la gestiun dal museum Engiadinais a San Murezzan i'l interess public, perque es gnieu elavuro üna convegno da prestaziun chi dess regler l'incumbenza da la gestiun. La convegno preschainta es gnida tematisada a la conferenza da presidents, la quela es gnida deliberada in sen positiv. Zieva cha'l museum es gnieu restoro as po fer quint in futur cun üna megladra rendabilitad. Que po gnir güdicho pür in 2 fin 3 ans, perque as fo quint per la prüma fasa ün import fix tenor clef da scumpart dal circol. Zieva cuorta

discussiun decida la suprastanza unanimamaing da suottametter la cunvegna a la prosma radunanza cumünela cun la proposta d'accepter quella.

169 0.209 Contrats e cunvegna
Contrat traunter la vschinauncha da S-chanf e la Bos-chetta Plauna SA, decisiun da desdir il contrat

In l'ultima tschantada vaiva la suprastanza tematiso las pussibiliteds da desdir auncha quist an il contrat traunter la Bos-chetta Plauna SA e la vschinauncha per mner la gestiun da la deponia. Tenor contrat as po desdir la fin da l'an 2016 süls 31.12.2017. Scha que nu succeda vo il contrat inavaunt per ulteriurs 5 ans. Zieva cuorta discussiun decida la suprastanza unanimamaing da desdir il contrat süls 31.12.2017. Duri Campell scu president dal cussagl administrativ da la Bos-chetta Plauna SA s'ho absanto per quista tractanda.

170 7.900 Planisaziun dal territori cumünel
Consultaziun adattamaints plan directiv chantunel i'l sectuors politica da la planisaziun dal territori (chapitel 2) e territori abitabel (chapitel 5)

Daspö meg 2014 es ieu in vigur la ledscha da planisaziun federela e l'uorden accessoric. Ils chantuns staun, tenor l'artichel 38 da la ledscha federela, adatter ils plans directivs a la nouva legislaziun federela. Cul sböz da l'adattamaint dal plan directiv preschaint i'ls sectuors politica da la planisaziun dal territori (chapitel 2) scu eir dal territori abitabel (chapitel 5) accumplescha il chantun Grischun quella pretaisa. Per mincha vschinauncha i'l chantun Grischun es avaunt maun üna calculaziun. 2/3 da las vschinaunchas grischunas haun memma grandas zonas da fabrica. Tar nossa vschinauncha es gnieu calculo ün suravaunz da 1'200 m². La suprastanza decida unanimamaing da fer valair, cha'ls plans nu correspuondan als plans da zonas actuels valabels, cha'l spazi aviert protet nun es gnieu resguardo, respectivmaing gnieu squintos. Impü nu sun ils differents lös dadour la zona da fabrica chi sun abitots, gnieus resguardos illa calculaziun e quellas surfatschas haun da gnir squintadas. La suprastanza pretenda da l'uffizi chantunel, cha la procedura da consultaziun dess gnir mneda tres aunch'üna vouta causa la pruna sbagls.

171 7.000 Provedimaint d'ova
Eliminaziun protecziun da zonas d'ova da fuonz per garantir la qualited da l'ova potabla, surdeda lavuors da geolog

Tenor ledscha per la protecziun da las ovas sun ils chantuns oblios, d'eliminar praisas d'ova da fuonz e praisas da reservuors chi staun in interess public in zonas per la protecziun d'ovas da fuonz e da regler la restricziun da proprietad. La regenza Grischuna ho piglio quista fatschenda sül program 2013-2016. In ün prüm pass s'ho da lascher examiner ad ün geolog ils differents lös. La proposta es, da lascher fer quella lavur insembel cun la vschinauncha da Zuoz, siand cha'l respunsabel per las ovas da tuottas 2 vschinaunchas vain involvo illa lavur preschainta. Zieva cuorta discussiun decida la suprastanza unanimamaing da surder la lavur insembel cun la vschinauncha da Zuoz a la firma Rüegg Ingenieurgeologie / Hydrogeologie da Cuira per l'import offert da fr. 24'262.20.

172 1.500 Militer
Implaunt da tir regiunel Bos-chetta Plauna

Per l'an 2017 s'ho previs investiziuns da fr. 1,8 milliuns e da l'an 2018 il listess import da fr. 1,8 milliuns per eriger il nouv implaunt da tir regiunel in Bos-chetta Plauna. Las vschinaunchas chi vulessan as participar vi da l'implaunt haun comunicho u comunicheschon fin ils 30 november 2016, scha quellas sun prontas da's participar cun ün import d'investiziun. La suprastanza da Zuoz ho decis da perseguiter da refer lur implaunt existent. Impü ho la societad da tregants piglio pusiziun ed ho signaliso, cha las

disciplinas da chatscha dessan eir gnir integredas in l'implaunt previs. Tenor stima muntan ils cuosts da fabrica sün 4,0 milliuns francs. Impü es evidaint, cha'l sector, inua cha l'implaunt vain fabricho, nu sto a disposiziun per depositer materiel da la deponia regiunela. Tenor stima vaun a perder per la vschinauncha entredgias d'arduond 1,0 milliuns francs. Tar l'infrastructura existenta in circumferenza da 15 kilometers sun già avaunt maun implaunts da tir da chatscha, implaunts da tir da 300 meters ed implaunts per trer cun pistolas. La suprastanza es da l'avis, chi nu fo sen da spordscher aunch'üna vouta tuot las spüertas chi existan e decida da fer üna cuntraproposta a la radunanza cumünela in fuorma redimensiuneda e moderna, chi dess fer part scu spüerta supplementera als implaunts existents illa regiun. Zieva animeda discussiun decida la suprastanza unanimamaing da suottametter a la prosma radunanza cumünela la seguinta proposta;

	fr.
• Edifizi da tir principel	250'000.00
• Implament da kino	200'000.00
• Distanza cuorta 10 meters	100'000.00
• Distanza cuorta 30 meters	330'000.00
• Implament trenamaint biatlon, cun access da catram	250'000.00
• IPV	90'400.00
• Planisaziun e mner la fabrica	113'000.00
• Contribuziun tir da chatscha vschinauncha da Zernez	20'000.00
• Contribuziun tir a schiabgia 300 m vschinauncha da Zuoz	<u>100'000.00</u>
Totel	1'453'400.00

173 1.500 Militer **Consultaziun plan sectoriel da militer**

Per pudair raggiundscher il böt da l'incumbenza, ho l'armada bsögn da l'infrastructura adequata. Il lö e l'utilisaziun da l'infrastructura da l'armada vegnan definös i'l concept da staziunamaint. Il plan sectoriel da l'armada garantescha la planisaziun optimela. Quel coordinescha l'infrastructura militera cun otras planisaziuns da la confederaziun e dals chantuns e garantescha cha la fabrica, la direcziun e l'utilisaziun da quist'infrastructura vegna amorniso il meglder pussibel cun ün'utilisaziun civila. Il plan sectoriel actual valabel es da l'an 2001. Da l'an 2007 s'ho vuglieu integrer in quel las plazzas aviaticas militeras scu eir oters sectuors. I'l sböz dal plan sectoriel da l'an 2007, chi'd es gnieu suottamiss a la procedura da consultaziun da sted 2007 cun l'integraziun da tuot las plazzas da tir, ils centers da logistica scu eir ils centers per la recrutaziun. Modificaziuns dal concept da staziunamaint haun mno, cha la lavur nun ho pudieu gnir glivreda a sieu temp. Uossa s'ho la pussibiltad da piglier pusiziun da la prüma fasa chi cumpiglia l'utilisaziun futura dals löös. Tenor las actas preschaintas es previs, cha l'implaunt in San Güerg vain nüzzagio eir in futur, que vuol dir, sur 10 ans. Eir la piazza da tir in Susauna, in vicinanza da Pro Pro es prevista da mantegner in futur. In üna seguonda fasa chi ho lö pü tard, s'ho la pussibiltad da piglier pusiziun regard il sector da tir. La suprastanza decida unanimamaing, siand cha tar nossa vschinauncha resta almain eir in futur scu chi'd es, da piglier pusiziun in sen positiv.

174 5.890 Ulteriur provedimaint sociel **Kibe, dumanda per ün sustegn finanziel pel schlargiamaint da la canorta Randulina a Zuoz, credit fr. 12'000.00**

In media occupescha ün iffaunt 2-3 dis l'eivna la canorta Randulina a Zuoz. Pel mumaint vegnan chüros 43 iffaunts, resguardand la cifra stu vessan esser a disposiziun 30 plazzas. Actual existan be 15 plazzas da chüra standartisedas. Il böt es, d'utiliser plainamaing la spüerta da la canorta a Zuoz. Las 3 ulteriuras canortas in Engiadin'Ota sun utilisadas plainamaing, ad existan perfin glistas d'aspet. Da nossa vschinauncha vegnan chüros pel mumaint 5 iffaunts illa canorta Randulina a Zuoz. Ils cuosts per l'ingrandimaint da 15 sün

30 plazzas muntan a fr. 230'000.00. Previs es, cha tuot las vschinaunchas da La Plaiv as participeschan cun ün sustegn finanziel. Zieva cuorta discussiun decida la suprastanza unanimamaing da sustgnair l'ingrandimaint da la spüerta cun fr. 12'000.00 e decida medemmamaing unanim da deliberer il credit bsögnaivel.

175 9.999 Varia

Il president preschainta il plan da piquet inviern 2016 regard la rumida da naiv düraunt las fins d'eivnas.

Inavaunt infurmescha'l, cha l'uffizi chantunel per trafic public ho infurmo, chi saja entreda üna dumanda per eriger tal Serlas Parc üna fermativa ufficiela.

Il president infurmescha, chi haun gieu discuors regard la loipa, eir in vista da la situaziun actuela da naiv. In mincha cas dess gnir tgnieu aint il plan da master da loipas, dunque a vain garantieu fin ils 15.12.2016 la colliaziun Samedan fin Zuoz. Fin ils 26.12.2016 dess la colliaziun Zuoz – S-chanf scu eir il liftin Bügls esser avaint maun.

A las 19.45 vain la tschanteda alveda.

In buna fè

:

L'actuar:
D. Schwenninger